

18. juli 2016

Inatsisartut suleriaasianni § 37 naapertorlugu matumuuna Naalackersuisunut imaattunik apeqquteqaatinik saqqummiussivunga:

**Apeqqut:**

- 1. Naalackersuisut maannamut qanoq iliuuseqarsimappat, aammalu siunissaq eqqarsaatigalugu qanoq iliuuseqassamaarpat anartarfilerineq pillugu malittarisassanik pioreersunik kommuunit atuutitsiniarnerat qulakkeerumallugu?**
- 2. Illoqarfinni qassini aammalu nunaqarfinni qassini anartarfilerinermi puusianiittut imaluunniit kuutsittakkani katersat eqqaavinnut iginneqaannartarpat, naak malittarisassatut atuuttut malillugit immamut igitassaasut?**
- 3. Anartarfiit imaannik aamma imermik errortuivikumik eqqaaneq pillugu Namminersorlutik Oqartussat nalunaarutaat nr. 10, 12. juni 2015-imeersumi § 26-imi aalajangersarneqarpoq, kommuunit nunaqarfinni illoqarfinnilu eqqakkat aqquataannik pilersuisimangitsut immamut igitsisarfirmik imaluunniit allatigut igitsinissamik akuerisaasumik peqassapput anartarfiit siparnit ammalu imermik errortuivikumik tankineersunik igitsiniarneq eqqarsaatigalugu. Igitsinissamut nutaanik sanaartuisoqassatillugu igitsinermut atortorisaq nutaaq Naalackersuisuniit akuerineqassaaq, § 28 malillugu. Igitsinermut atortorissaarutit atuutereersut akuersissummik piniaqqaarani atuinnaarsinnaapput. Taamaattoq Naalackersuisut § 28 imm. 3 aamma 4 malillugu kommune peqqusinnaavaa piffissaq aalajangiussaq minnerpaamik ukiup ataatsip iluani igitsisarnermut atortooreersut akuersitinniassallugit. Naalackersuisut perisarfissamik tamatuminnnga atuippat, aammalu siunissaq eqqarsaatigalugu Naalackersuisut qanoq pilersaarpat atuutsinniarnissaa eqqarsaatigalugu?**
- 4. Suleqatigiissitap pilersinneqareersimasup suliai sumut killippat, Naalackersuisut pilersitarivaat anartarfilerinermi eqqaasarnermi imalunniit igitsisarnerup iluani ajornartorsiutaasunut aaqqiissutissanik ujartuinermi? Sunik inerniliisoqarpa, aammalu iluarsartuullugit pilersaarusiit qanoq ittut aallartinneqarsimmappat, suut suli aallartissimangillat, aammalu qaqugukkut naatsorsuutigineqassava iluarsartuullugit pilersaarusiit naamassinissaat?**

(Inatsisartuni ilaasortaq, Laura Tàunâjik, Siumut)

## **Tunnqavilersuineq:**

Illoqarfiit nunaqarfiillu amerlanerpaat anartarfilerinermut atortussaqaqngillat, inatsisit atuutereersut malillugit sananeqarsimasunik. Tamanna takuneqarsinnaavoq sanaartornermut immikkoortanik pilersaaruummi eqqaaveqarnerlu pillugu immikkoortami, taannalu Naalakkersuisunit saqqummersinneqarpoq majimi 2015-imi.

Illoqarfiit nunaqarfiillu ilaat anartarfilerinermi katersukkatik imerpalasunngorlugit katersortarpaat imaluunniit puusiat atortorineqartut eqqaavinnut igiinnartarlugit eqqakkat allat akornannut. Peqqinnissaq eqqarsaatigalugu eqqiluisaarnermut peqqinnangilaq akuerineqarsinnaananilu nappaatinik siammarterilluni aattuisinnaammat. Anartarfilerinermiit igitassat inatsisit atuuttut malillugit tamatigut immamut igitassaapput.

Illoqarfinni nunaqarfinnilu eqqakkanik aqquteqaqngitsuni anartarfilerinermi igitassat immamut kuutitsiveqarput, ilai ruujoritut iluseqarput (anartarfilerineq puusiaqaqngitsumik katersorneqaraangat) imaluunniit sisoorfik (anartarfilerinermi puusiat atortillugit). Kuutitsiviit amerlanerit naappallaarput immamullu anngussinnaanatik. Piffiit ilaanni anartarfilerinermi eqqakkat sivinganikkut nakkartiinnarneqartarput.

Anartarfilerinermi puussianik plastikinik sanaanik katersorneqartarput, puusiat sipineqartarput, kuutitsiviillu atuinnarlugit imarisai assaannarsorluni kuineqartarput pinngortitamut kuutsiinnarlugit, tamannalu nappaatinik aattuinnissamik annertuumik ulorianaateqarataarsinnaavoq.

Taamatuttaaq aamma ajornartorsiutaavoq, anartarfilerinermut atortorineqartut piffiit ilaanni nunaqarfimmi illoqarfimmiluunniit najugaqarfiup qeqqaani inissisimasaramik, tamannalu tipimik annertuumik kinguneqartarpoq aammalu nappaatinik aattuinnissamik ulorianaateqartitsillutik.

Namminersorlutik Oqartussat nalunaarutaat nr. 10, 12. juni 2015-imeersumi § 32-imi, anartarfilerinermi katersukkat imerpalasullu pillugit aalajangersaasoqarpoq, anartarfiit siparnit imarisaat aammalu slamtankineersut katersukkat peqqinnissaqarnermut avatangiisinullu mingutsitsissutaanngitsumik illersorneqarsinnaasumillu ingerlanneqassasut.

Pinngortitamut, Avatangiisinut Nukissiuuteqarnermullu Naalakkersuisoqarfik sanaartugassanut pilersaarutit naapertorlugit suleqatigiissitamik pilersitsisimavoq, ajornartorsiutinik aaqqiissutinik ujartuinerminni inerniliisussa, piareersaatitut sammillugit qulaajaniarlugit. Suleqatigiissitap sinniisai nersutit nakorsaannit aammalu peqqinnissaqarfimmeersunit nunattalu nakorsaata allaffeqarfianiit ilaasortaataitaqarpoq.